

# Tutuon te Konabwai n Ira te Takakaro

E ataia Jared bwa e memena irarikina Iesu Kristo.

**Iroun Noelle Lambert Barrus**  
(E boboto i aon te karaki ae koaua)

E riki te karaki aei i Buranti.

A katebetebea te booro Jared inanon te tabo n takakaro. A biribiri irarikina taan takakaro, aia kau ae tangitang iaon te timanti.

“Bwatinna nakoiu!” E wewete Gabriel.

Jared e angan Gabriel te booro ao e teimatoa ni biri. Imwiina e a manga anga te booro rikaaki Gabriel. Jared e karea kourun te booro.

*SWOOSH!*

E rin te booro!

“Tikiraoi, Jared,” e taetae ana tia kairiiri imwiin te takakaro.

“Ko ataia, ai ti uoua te wiiki ngkai te tutuo ibukin te konabwai n te takakaro ibukin rinean te tiim”

E wiingare Jared. Bon ti tabeman taan takakaro ake a kaokaki n ira te tutuo aei ibukin te tiim.

E na karaoaki te tutuo n te Tabati,” e taetae ana tia kairiiri. E na kona n reke am tai iai?”

E buanako kukurein Jared.

“N te Taabati?” E titiraki Jared.

“Eng. Iai te kangaanga?”

E tabe n iangoia Jared. Aei ana tai n takakaro n te tiim ae rangi n tamaroa! Ma te Tabati bon ana tai n nakon taromauri ao ni kabanea ana iango iroun ana tia Kamaiu.

“Te Taabati bon te bong ae e onoti irou,” e taetae Jared.

“N na marooro ma au karo iaon anne.”

N te tairiki anne, e tekateka Jared iaon ana kainiwene ma ana karo. E kakibarakea ana bwatiketibooro ngke e iango.

“I rangi n tangiria n iira te tutuo ibukin te tiim,” e tuanga Tinana ao Tamana. “Ma I aki tangiria ni karaoia n te Tabati. I ataia bwa e kakawaki riki te Atua nakon te bwatiketibooro.”

Tera ae ti kona ni karaoia bwa ti na ibuobuoki iai?” E titiraki Tinana.

E taua te booro i baina Jared. “Ti kona n tataro ni ikotaki?”

E katuka ana booro ni bwatiketi ao ni katorobubua ma Tinana ao Tamana. “Tamara are i Karawa,” e taku, “I rangi, rangi n tangiria ni tuoaki ibukin te tiim ni bwatiketibooro aei. Ma te

tutuo e na boo n te Taabati! I ataia bwa te Tabati bon te bong ae I anga Nakoim. Tera ae N na kona ni karaoia?”

Imwiin te tataro, Jared e namakina e rau n nano.

“Tera am namakin?” E titiraki Tinana.

“I aki nakon te tutuo ngkana e na karaoaki n te Taabati,” e taku. “Ma I namakinna bwa e na bon Nakoraoi”

Uabong te bong imwiina, e karekea te imeeri tinan Jared. E taku bwa te tutuo e nang karaoaki n te Kaonobong!

E a kona n ira te tutuo Jared ao ni katabua te bong ae te tabati! E ataia bwa e ongo ana tataro Tamara are i Karawa.

Inanon uoua wiiki imwiina, e kabatiaa ana kataneiei Jared n te bwatiketibooro. Ngke e a roko te bong arei, e kabanea ana kona Jared. E kabirimwaaka imarenaia taan takakaro, reke ana rin aika a mwaiti, ao ni kaungaia kaain ana tiim.

“Taan takakaro aikai a na reitanako te tutuo n te konabwai ibukin te tiim, e taetae te tia kairiiri imwiin te moan raau. “Taitaoka kakauongo nakon arami.”

E bukibuki mwanawan Jared. E wetea aran temanna te tia kairiiri. Ao imwiina temanna. Ao are imwiina. E namakina nanona Jared ibukin kan irakin te tiim bwa e moana ni bua.

Imwiina e a bane warekan taian ara iroun te tia kaira te takakaro. E aki weteaki aran Jared. Jared e naaki ira te mwaing nakon te kauoua n raau n te tutuo.

E tekateka iaon te benti iakuun te tabo n takakaro Jared ao n taratara ana kau. E a tia ni mwakuri korakora. Ma e namakinna bwa ana mwakuri mwaaka bon akea nanona.

Ngke e anaia tinana, e ioiowa atuuna Jared. “I aki riki bwa kaain te tiim.”

E koonaki iroun Tinana. “I nanokawaki ngkai e aki nakoraoi are ti tangiria,” e taetae tinana.

E ikerake Jared. Ma imwiina, e roko n ana iango te rau.

“A aki nanakoraoi n taainako bwaai ake I tangiria,” e taku.

“Ma e ataa au namakin raoi Iesu Kristo. E mena irarikiu.”

E wiingare tinana. “Eti ae ko taku! E atai ara namakin.”

E wiingare Jared. E bon nanokawaki, ma e namakina riki ataakina bwa ana Tia Kamaiu e oota n ana namakin. E ataia Jared bwa Iesu e na bon teimatoa n tangiria ao ni boutokaia. ●

